

濂洛風雅(二)
天地間集



雅 風 洛 濂

(二)

編 行 伯 張

編主五雲王
編初成集書叢
種一他其及雅風洛濂
冊 二

中華民國二十四年十二月初版

編者 張伯行

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

*D1101

張



叢書集成

初編

主編者
王雲五

商務印書館發行

濂洛風雅卷之六

朱晦庵

七言律

次韻傅丈題呂少衛教授藏書閣

西樓誰與共閒居。茂樹婆娑清晝餘。大隱祇今同一壑。行吟非昔似三閩。揣摩心事惟黃卷。料理家傳亦素書。更鑿寒泉供漱石。世紛不擬問焉如。

和劉抱一

幾年牢落舊村墟。此日翛然水竹居。病起試尋春徑草。客來聊煮雪畦蔬。開樽細說平生事。信手同緝集古書。適意何勞一千卷。新詩閒出笑談餘。

再和

久矣投裝返舊墟。不將心事賦閒居。荷鋤帶月朝治穢。植杖臨風夕挽蔬。三徑猶尋陶令宅。萬錢聊借鄴侯書。木瓜更得瓊琚報。吟詠從今樂有餘。

數日前與判院丈有宋村之約。雪中有懷。奉呈判院通判二丈。

雲垂天闕歲將闌。一室翛然獨掩關。擁褐不知風折木。開軒惟見雪漫山。玄空杳靄低迷外。碧樹瓏璁掩

映閒吟罷左思招隱句。扁舟無路過長灣。

奉陪彥集充父同游瑞巖謹次莆田使君留題之韻。

踏破千林黃葉堆。林閒臺殿鬱崔巍。谷泉噴薄秋逾響。山翠空濛畫不開。一壑祇今藏勝槩。三生疇昔記曾來。解衣正作畱連計。未許山靈便卻回。

伏讀趙清獻公瑞巖留題感歎之餘追次元韻。

趙公名迹此猶微。已薦行藏第一機。直自當年畱翰墨。至今窮谷尚光輝。時清諫疏空遺藁。歲晚高齋自掩扉。高齋公晚年所居每夕獨處一室使人屬其外云。珍重九原如可作。問渠何處是真歸。

伏讀二劉公瑞巖留題感事興懷至於隕涕追次元韻偶成二篇。

誰將健筆寫崖陰。想見當年抱膝吟。緩帶輕裘成昨夢。遺風餘烈到於今。西山爽氣看猶在。北闕精誠直自深。故壘近聞新破竹。起公無路祇傷心。

投紱歸來臥赤城。家山無處不經行。寒巖解榻夢應好。絕壁題詩語太清。陳迹一朝成寂寞。靈臺千古自虛明。傳來舊業荒蕪盡。慙愧秋原宿草生。

舫齋

扁舟容與小房櫳。搖颺簾旌蜀錦紅。兩岸蒹葭秋色裏。一川煙浪夕陽中。不愁澗瀨雙蓬鬢。未怯江湖萬里風。築室水中聊爾爾。何須極浦望朱宮。

月波臺

潺湲流水注回塘。中作平臺受晚涼。四面不通車馬迹。一尊聊飲芰荷香。韓公無復吟花島。楚客何勞賦藥房。少待須臾更清絕。月華零露洗匡牀。

挽蔬園

未覺閒來歲月頻。荷鋤方喜土膏勻。連畦已放瑤簪露。覆地行看玉本新。小摘登盤先餉客。曉炊當肉更宜人。卻憐寂寞公儀子。拔盡園蔬不歎貧。

曲池軒

去年種竹長新篔。今歲穿渠過野塘。自喜軒窗無俗韻。亦知草木有清香。林閒急雨生秋思。水面微風度晚涼。卻厭端居苦無事。凭欄閒理釣絲長。

畱秀野劉丈二首

好雨當春過一犁。我公遠憶故園西。孤蓬穩轉清灘急。十里行穿綠樹齊。路熟已欣經霧市。身輕未怕蹠雲梯。諸孫賸欲畱公住。細和新詩句指迷。

一去屏山今幾春。歸來三徑但荒榛。翦除便覺風煙好。徙倚還驚物色新。樓外千林遮去路。階前一水戀行塵。勸君更作畱連計。同社追游苦未頻。

次秀野滄波館刈麥

傳聞泛宅賀新成。破月衝煙取次撐。鷁首斜飛寒浪急。篷窗側轉好山橫。知公興有江湖迴。顧我詩無玉雪清。欲跨船舷還未敢。幾時得伴鏡中行。

次秀野詠雪韻首二

閉門高臥客來稀。起看天花滿院飛。地迴杉篁增勝槩。庭虛烏鵲噪空飢。酒腸凍澀成新恨。病骨侵淩減舊肥。賴有袁生清興在。忍寒應未泣牛衣。一夜洞雲而四山。曉來千里共漫漫。不應琪樹猶含凍。翻笑楊花許耐寒。乘興正須披鶴氅。淪甘猶喜破龍團。無端酒思催吟筆。卻恐長鯨吸海乾。

次秀野韻

當年共翦北山萊。峭竹成陰手自栽。書卷莫教春色老。紫荊肯爲俗人開。公能顧我傳新句。我欲畱公撥舊醅。悵望南園芳樹底。明年應放小車來。

次秀野躬耕桑陌舊園之韻首二

郊園旱久只多蹊。昨夜欣霑雨一犁。已辦青鞵隨老圃。便驅黃犢過深溪。農談賸喜鄉鄰近。饅具仍教婦子攜。指點竹寒沙碧處。不知何似錦城西。丈人高致邈難干。雲夢何如胷次寬。老去未妨詩律在。人來只怕酒杯乾。故開麥隴供家釀。更有蘭章付客看。下走才慳慙屬和。願公物色稍畱殘。

次韻雪後書事

未覺春光到柳條。誰教飛絮倚風搖。眼驚銀色迷千里。夢斷彤庭散百寮。梅塢任從長笛弄。竹窗閒把短檠挑。何人剝啄傳清唱。更喜殘年樂事饒。

次秀野春晴山行紀物之句

祇憑詩律作生涯。到處山林總是家。便與清尊臥芳草。有妨皂蓋拂殘花。側聞溫詔詢耆艾。好趁春風入殿衙。回首能忘舊猿鶴。一篇聊爾記年華。

次韻寄題芙蓉館

不須艇子棹歌來。且看芙蓉面面開。卷裏有詩都錦繡。席間無地可塵埃。風清月白琴三弄。綠暗紅深酒一杯。明日仲宣樓上去。越吟仍是首頻回。

葺居

次秀野雜詩韻

丈人高臥碧江頭。門掩西風萬木秋。重喜青山還繞屋。卻嫌黃葉漸平溝。開軒且放浮嵐入。決水徐通廢圃流。便覺園林頓蕭爽。不妨隨境味玄幽。向來鞅掌元非病。此日徜徉詎有妨。自喜登臺開瘦竹。人驚屣響空廊。高齋雨過新山色。曲沼風來舊水光。千里壯心殊未已。不應疏嬾與能長。

題鄭德輝悠然堂

高人結屋亂雲邊。直而羣峯勢接連。車馬不來真避俗。簞瓢可樂便忘年。移筇綠幄成三徑。回首黃塵自一川。認得淵明千古意。南山經雨更蒼然。

仲縝尊兄對策南宮。相顧田舍。輒賦攀餞。

三徑荒涼獨掩門。故人車馬過相存。長安此去無千里。濁酒何妨盡一尊。共說淵源非曩日。好披肝膽奉明恩。不辭妄竊仁人號。執手臨歧敢贈言。

送謝周輔入廣

夫君壯節與奇謀。屈首微官世所羞。攬轡未妨聊矍鑠。賦詩直爲寫離憂。蒼茫嶺海三年別。珍重親朋幾日留。滿意分攜一杯酒。登山臨水不能休。

和亦樂園韻

莫笑君家五畝園。要須胷次亦平寬。坐閒花柳陰初合。望外山河勢若蟠。把酒儘誇雙鬢綠。擊鮮爭見兩輪丹。鄰翁未到心先識。更喜詩筒得細觀。

遊密庵分韻賦詩得清字

誤落塵中歲序驚。歸來猶幸此身輕。便將好友尋山去。更喜新詩取意成。煖翠乍看渾欲滴。寒流重聽不勝清。箇中有趣無人會。琴罷尊空月四更。

宿密庵分韻賦詩得衣字

不到仙洲歲月移。攜壺特地款巖扉。已驚素雪清人骨。更喜蒼煙染客衣。新賞不妨頻徙倚。舊題何事獨
歎欬。明朝驛騎黃塵裏。莫待迷塗始賦歸。

次圭父觀魚韻

平生三伏斷追游。誰喚來穿澗樹幽。初訝網橫天影破。忽驚人蹴浪花浮。鳴榔不用齊吳榜。鼓柁何須學
楚謳。便有金盤堆白雪。卻憐清泚向東流。

次晦叔寄弟韻

聞道君歸湘水東。經行長在白雲中。詩成天柱峯頭月。酒醒朱陵洞裏風。舊學難酬香一瓣。流年誰管鬢
雙蓬。書來爲指清訛處。不涉言詮不落空。

試上閩山望楚天。雁飛欲斷勢還連。憑將袖裏數行字。與問雲間雙髻仙。我訪舊游終有日。君歸故里定
何年。祇今千里同心事。靜對簞瓢獨喟然。

熹次延之年兄韻。敬題紹德庵真如軒。寫呈伯時季路二兄。

先生可是愛吾廬。來住鄰庵幾閏餘。栢下竟開千歲室。竹間猶插萬籤書。悲涼共識臨風處。游戲誰知落
筆初。寄語山靈勤守護。莫將題柱比相如。

九日登天湖。以菊花須插滿頭歸分韻賦詩得歸字。

去歲瀟湘重九時。滿城寒雨客思歸。故山此日還佳節。黃菊清樽更晚暉。短髮無多休落帽。長風不斷且

吹衣相看。下視人寰小。祇合從今老翠微。

和人游西巖

平生壯志浩無窮。老寄寒泉亂石中。閒去披襟弄清泚。靜來合眼聽玲瓏。不知澗寺晴時雨。何似溪亭落處風。吟罷君詩自瀟灑。此心端不限西東。

擇之賢友歸途左顧。示以四明酬唱。煥爛盈編。三復詠歎。想見聚游之樂。輒用黃山卽事之韻。賦呈擇之。兼懷子重老兄。順之賢友。

十年身臥白雲堆。已分黃塵斷往回。不是幽人遺俗去。肯尋流水渡關來。三秋風月從頭說。千里湖山覲面開。久欲過逢須一快。豈知勞結倍難裁。

次韻題平父兄重建一枝堂

畫戟朱門枕碧山。貂蟬元自出儒冠。更餘此日林閒樂。遠繼當年膝下歡。命駕賓朋千里近。放懷琴酒百憂寬。遺編卻好傳孫子。莫遣因循學宴安。

次卜掌書落成白鹿佳句

重營舊館喜初成。要共羣賢聽鹿鳴。三爵何妨奠蘋藻。一編詎敢議明誠。深源定自閒中得。妙用元從樂處生。莫問無窮庵外事。此心聊與此山盟。

白鹿講會次卜丈韻

宮牆蕪沒幾經年。祇有寒煙鎖澗泉。結屋幸容追舊觀。題名未許續遺編。請爲澗主不報青雲白石聊同趣。謂西
公。霽月光風更別傳。謂濂溪夫子珍重箇中無限樂。諸郎莫苦羨騰鶩。

再用前韻示諸同游。

幽臥寒巖不記年。飽看山月聽風泉。舒憂正得琴三疊。玩意惟憑易一編。誤落塵中乖夙尚。卻思洞裏付
真傳。封章倘幸天從欲。便解銅符謝繫鸞。

次韻四十叔父白鹿之作。

誅茅結屋想前賢。千載遺踪尚宛然。故作軒窗挹蒼翠。要將絃誦答潺湲。諸郎有志須精學。老子無能但
欲眠。多少箇中名教樂。莫談空諦莫求仙。

奉同都運直閣張丈哭敬夫張兄。張丈有詩。敢次元韻。悲悼之極。情見乎詞。伏幸采覽。二首

秀翁威略憺華戎。遺恨車書久未同。喜有象賢堪副事。故知鴻業自無窮。蕃宣合奏三年最。風采俄驚一
旦空。根本平生有深計。遺書不但子囊忠。

不應世道卽漂淪。何事今年失此人。禮樂端能懷益友。琴笙忍遽樂嘉賓。亦知游好曾通譜。卻記登臨喚
卜鄰。兩首悲詩數行淚。感傷那復鬪清新。張丈垂顧。適聞訃音。爲罷郡宴。敬夫向嘗約熹徙居湖之上。蓋相語於裴公壘上云。

次韻寄題萬頃寒光奉呈休齋先生。

閒將歲月老煙汀。更遣詩情到杳冥。游子故應悲舊國。壯懷那肯泣新亭。一官避世今頭白。萬卷收功久

汗青。但見潮生與潮落。不知沈醉又還醒。

熹伏蒙休齋先生惠詩見畱。謹次高韻。

忽驚蕭颯鬢毛秋。起向東山覓舊游。盤谷門前淚霑臆。雲臺溪上雪蒙頭。歸歟吾黨又千里。老矣心期但一丘。珍重休齋書滿屋。可無三宿爲君畱。

伏承侍郎使君垂示所與少傅國公唱酬西湖佳句。謹次高韻。聊發一笑。

百年地闢有奇功。勛見猶驚鶴髮翁。共喜安車迎國老。更傳佳句走郵童。聞來且看湖頭入。樂事寧憂酒棹空。會見台星與卿月。交光齊照廣寒宮。

越王城下水融融。此樂從今與衆同。滿眼芰荷方永日。轉頭禾黍使西風。湖光盡處天空闊。潮信來時海氣通。酬唱不誇風物好。一心憂國願年豐。

伏讀致政少傅相公送趙成都佳句兩篇。不勝慰幸。已次高韻。并餽其行。而再賦此章。此見區區

瞻仰之意。繕錄並呈。伏乞采覽。二首

歸來寂寞臥漳濱。夢想威容阻再親。綠野遙開花欲語。赤書還喜雁來賓。閒中有句人爭誦。妙處無心物自春。行馬不因吾輩設。胷奇猶得話陳陳。

一旦高辭將相權。身名從此慶雙全。人誇迹已風塵外。誰道心游日月邊。未許前賢專晚節。更將餘事發春妍。君王若要詢黃髮。便好臨雍促肆筵。

懷潭溪舊居

憶住潭溪四十年。好峯無數列窗前。雖非水抱山環地。卻是冬溫夏冷天。繞舍扶疏千箇竹。倚崖寒冽一泓泉。誰教失計東遷繆。憊臥西窗日滿川。

承事卓丈置酒白雲山居。飲餞致政儲丈叔通。因出佳句。諸公皆和。熹輒亦繼韻。聊發坐中一笑。老去讀書秋樹根。山林兒女定誰尊。東坡賦徐德占舊居。有一兒女。始覺山林尊之句。偶緣送客來僧寺。卻似披雲臥石門。物外祇今成跌蕩。人閒何處不啾喧。一杯且爲陽關盡。雙目從教別淚昏。

引年得請。伏蒙致政學士契丈。特垂慶問。寵以佳篇。捧玩之餘。感愧亡量。輒借高韻。少見謝誠。伏

幸笑鑑

一氣無私物自繁。放臣偏荷主恩寬。方慙妄竊老夫號。詎敢重簪博士冠。身退未妨閒養病。年豐何幸且偷安。新篇似許參同社。願刺仙舟上釣灘。

蒙恩許遂休致。陳昭遠丈以詩見賀。已和答之。復賦一首。

闌干苜蓿久空槃。未覺清羸帶眼寬。老去光華姦黨籍。向來羞辱侍臣冠。極知此道無終否。且喜閒身得暫安。漢祚中天那可料。明年太歲又涪灘。建隆庚申。距今已未二百四十年矣。嘗記年十八歲時。先君慨於今甲子。又復一周。而衰病零落。終無以少塞臣子之責。因和此詩。并記其語。以示兒輩。爲之灑然感涕云。

叔通老友探梅得句。不鄙垂示。且有領客攜壺之約。次韻爲謝。聊發一笑。

迎霜破雪是寒梅。何事今年獨晚開。應爲花神無意管。故煩我輩著詩催。繁英未怕隨清角。疏影誰憐離綠杯。珍重南鄰諸酒伴。又尋江路覓香來。

和子激白鹿之句

經句不到鹿場陰。夢想飛馳不自禁。幸有高軒同勝賞。何妨折屐共幽尋。徘徊未厭詩書樂。感慨難忘忠孝心。更對豐鐻哦伐木。風泉雲壑助清吟。

次彥集經營別墅之作

回北成南指顧閒。要今華敞對巒岈。家山信有千巖擁。家山堂見武夷諸峯雲月何妨兩處觀。傑閣已資鄰築勝。嘉近舊第樓居。蒙知府撥賜新基還見綠牆寬。老仙鶴骨殊蕭爽。歸興從今豈易闌。

伏蒙致政少傅相公寵賜寄題武夷精舍詩一首。拜受捧讀。不勝仰歎。無以自見。區區感幸之誠。

輒繼高韻。舊彌公所居坊名取答詔語也。

望斷鈞天白玉都。石田茅屋詎應無。況蒙一字榮褒袞。便覺千峯勝畫圖。舊彌詩情高綠野。狂奴心事只風雲。蒲輪幾日符嘉夢。恰有流霞酒一壺。李義山武夷詩有流霞酒一杯句。

五言絕句

開蟬

悄悄山郭暗。故園應掩扉。蟬聲深樹起。林外夕陽稀。

汲清泉。漬奇石。置熏鑪其後。香煙被之。江山雲物。居然有萬里趣。因作四小詩。
晴窗出寸碧。倒影媚中川。雲氣一吞吐。江湖心渺然。
一水渺空闊。羣山中接連。寒陰白霧湧。飛度碧峯前。
隱几對寒碧。忘言心自閒。豈知宜寂士。滅迹青峯門。
吟餘忽自笑。老矣方好弄。慨然思古人。尺璧寸陰重。

家山堂晚照效輞川體

二首

夕陽浮遠空。西峯背殘照。爽氣轉分明。與君共晚眺。
山外夕嵐明。山前空翠滴。日暮無與期。閒來岸輕幘。

奉同張敬夫城南二十詠

納湖

詩筒連畫卷。坐看復行吟。想像南湖水。秋來幾許深。

東渚

小山幽桂叢。歲暮靄佳色。花落洞庭波。秋風渺何極。

詠歸橋

綠漲平湖水。朱欄跨小橋。舞雩千載事。歷歷在今朝。